



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆԻ ԹԻՎ 1 ԴԱՏԱԿԱՆ ԿԱԶՄԻ  
Ո Ր Ո Շ ՈՒ Մ

---

ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՀԱՐՑԻ ՎԵՐԱԲԵՐՑԱԼ

Քաղ. Երևան

31 օգոստոսի 2010թ.

Հայաստանի Հանրապետության սահմանադրական դատարանի  
թիվ 1 դատական կազմը՝

Նախագահությամբ՝ Վ. Հովհաննիսյանի

Անդամակցությամբ՝ Վ. Պողոսյանի

Կ. Բալայանի

Ուսումնասիրելով քաղաքացի Սերգեյ Շահինյանի անհատական դիմումով  
գործը քննության ընդունելու մասին հարցը,

ՊԱՐԶԵՑ.

Համաձայն ՀՀ Սահմանադրության 101-րդ հոդվածի 1-ին մասի 6-րդ կետի՝ քաղաքացի Սերգեյ Շահինյանը 19.08.2010թ. դիմել է ՀՀ սահմանադրական դատարան՝ խնդրելով քննության առնել եւ որոշել ՀՀ աշխատանքային օրենսգրքի 12-րդ հոդվածի՝ «գործատուների կամ քաղաքացիների» իրավադրույթի համապատասխանությունը ՀՀ Սահմանադրությանը, մասնավորապես վերջինիս 1-ին հոդվածով սահմանված իրավական պետության սկզբունքին եւ 14.1-րդ հոդվածի պահանջներին:

Դիմողը գտնում է, որ գործատուները եւ քաղաքացիները, տվյալ դեպքում՝ աշխատողները, հանդիսանում են իրավահարաբերության հակադիր կողմեր, ունեն տարբեր,

միմյանց հակասող շահեր: Օրենսգրքով գործատուներին եւ աշխատողներին տրված իրավունքների ուսումնասիրությունից բխում է, որ մի դեպքում այդ իրավունքները շահավետ են գործատուի համար, մյուս դեպքում՝ աշխատողի: Նման պայմաններում աշխատանքային օրենսգրքի 12-րդ հոդվածը տարբեր դիրքերում գտնվող սուբյեկտների վրա տարածելը, նրանց համար միասնական իրավակարգավորում նախատեսելն առաջացնում է իրավական անորոշություն: Դիմողը նաեւ նշում է, որ «Իրավական ակտերի մասին» ՀՀ օրենքի համաձայն՝ «կամ» շաղկապից առաջ եւ հետո ընկած պայմանների դեպքում իրավակիրառողը հաշվի է առնում այդ պայմաններից որեւէ մեկի առկայությունը: Նման պայմաններում դատարաններին տրվում է լայն հայեցողություն, ինչը կարող է հանգեցնել կամայականությունների, այն է՝ դատարաններն իրենց քմահաճույքով կարող են պաշտպանել մի դեպքում գործատուների, մյուս դեպքում՝ աշխատողների շահերը՝ խախտելով ՀՀ Սահմանադրության 14.1-րդ հոդվածով սահմանված՝ օրենքի առջեւ բոլորի հավասարության սկզբունքը:

Հիմք ընդունելով «Սահմանադրական դատարանի մասին» ՀՀ օրենքի 32-րդ հոդվածի 3-րդ մասի եւ 69-րդ հոդվածի 1-ին մասի պահանջները՝ վերոնշյալ դրույթների մասով դիմումի հիման վրա գործի քննությունը ենթակա է ՀՀ սահմանադրական դատարանի կողմից մերժման, քանի որ դիմողը չի հիմնավորել, թե վիճարկվող նորմի իրավական անորոշության արդյունքում իր որ սահմանադրական իրավունքն է խախտվել, դիմողը չի հիմնավորել նաեւ իր սահմանադրական իրավունքների ենթադրյալ խախտման փաստի եւ վիճարկվող դրույթի իրավական անորոշության միջեւ պատճառահետեւանքային կապի առկայությունը, ինչը, ըստ «Սահմանադրական դատարանի մասին» ՀՀ օրենքի 69-րդ հոդվածի 7-րդ մասի՝ անհատական դիմումն ակնհայտ անհիմն համարելու հիմք է:

Բացի դրանից, նորմատիվ դրույթի իրավական անորոշությունը չի կարող գնահատվել այլ դրույթներից մեկուսացված. այդ նպատակով անհրաժեշտ է տվյալ դրույթը դիտարկել այլ իրավադրույթների հետ համակարգային փոխկապակցվածության մեջ: Տվյալ դեպքում վիճարկվող դրույթի իրավական անորոշությունը պարզելու համար հարկ է այն դիտարկել ՀՀ աշխատանքային օրենսգրքի 12-րդ հոդվածի 1-ին նախադասությունում ամրագրված նորմի հետ, որը սահմանում է աշխատանքային օրենսգրքի հետադարձ ուժով կիրառման ընդհանուր կանոնը: Այդ ընդհանուր կանոնի համաձայն՝ օրենսգիրքը

հետադարձ ուժով կիրառման ենթակա չէ, բացառությամբ օրենքով նախատեսված դեպքերի: Միաժամանակ, որպես այս ընդհանուր կանոնից բացառություն՝ օրենսգրքի վիճարկվող դրույթը սահմանում է այն դեպքերը, երբ օրենսգրքի հետադարձ ուժով կիրառումն արգելվում է: Ի թիվս այլնի, արգելվում է օրենսգրքի հետադարձ ուժով կիրառումը, եթե սահմափակվում են գործատուի կամ քաղաքացիների իրավունքները:

Ելնելով վերոգրյալից եւ ղեկավարվելով «Սահմանադրական դատարանի մասին» ՀՀ օրենքի 31-րդ հոդվածով, 32-րդ հոդվածի 6-րդ կետով, 69-րդ հոդվածի 7-րդ մասով, ՀՀ սահմանադրական դատարանի կանոնակարգի 26-րդ հոդվածով՝ ՀՀ սահմանադրական դատարանի թիվ 1 դատական կազմը

ՈՐՈՇԵՑ.

Քաղաքացի Սերգեյ Շահինյանի անհատական դիմումով գործի քննությունը մերժել:

Նախագահող  
Անդամներ

